

N° 73  
Abril de 2003

*mainatges d'òc*  
**PLUMALHON**

(5,34 €)

ISSN 1264-6733



**Lo telefòne**

**Lo peresós**

# Las rosèlas

Tanlèu lo mes de mai, d'unes camps s'ondran d'un grand mantèl roge. Son de milierats de flors que lo fan : las rosèlas, apeladas tanben capròsas o parpèls.

**E**n mai, aquela planta creis rapidament en longas tijas que pòdon far un seissanat de centimètres d'auçada.

Al cap d'aquelas tijas, vesèt un broton oval borrut. Per ara, aquel broton es barrat. Mas dins quelques jorns, espelirà e sos grands petals roges se desplegaràn.

Coma aqueles petals èran sarrats dins lo broton, auràn un aspècte rugat pendent quelques jorns.



**A**l centre de la flor, lo còr redond, verd, raiat de negre. Es l'organ femenin de la flor. Tot lo torn, se veson de tijas finetas qu'a la cima an de boletas cobèrtas de pollèn. Son los organs masculins. Quelques jorns après, la rosèla tombarà los petals. Sus la tija, demorarà pas que l'organ femèla, lo pistil, que dedins, la planta i fabrica sas granas.

Quand los insèctes venon butinar las flors, empòrtan de pollèn per las patas o pel còs e lo van pausar sus l'organ femèla de la rosèla d'a costat. Es aital que la flor es fecondada.

**Q**uand las granas son maduras, la partida superiora del pistil se dubrís e las daissa anar al vent que las escampilha a l'entorn.

Las granas grellharàn e donaràn de rosèlas joves l'annada d'après.



Tèxte e fotografias Fred Lavail